



# Jiban Jen Lan

Kakobaba jen  
Watson Goodman

Kin ejelok onen –  
Jab wia Kake

## JIBAN JEN LAN

“JIBAN JEN LAN” ej kobain eon ko im reier wot juon ilo Bible. Ij tomak melele ko remon rej itok jen Bible eo wot.

Nan ko an Anij, rej itok “jen lan” im rej likun in wor tok-jeir non buruo ko rej kole im maro kin kojarjar. Ne juon armij ej ukwelok, uktak im jolok jerawiwi ko an, im kadelon Iroj ilo buruon, im tomak ilo aolepen buruon, bwe Jesus Christ ej Iroj, Anij enaj delon ilo buruon im Iroj enaj bed ilo e, monono im ainemon eo an enaj bed ilo buruon eo ej tomak. Iar jela kin menin ilo 1937 eo im Iar monono kin jemdon in ibben Iroj im ij rojan kom bwe kon lelok kom non Iroj ak ujileb lok kom none.

—Watson Goodman

---

Bible text used is from the Marshallese Bible, copyright 1982 by United Bible Society. Used by permission.

Kiō kar ran eo mokta jen Kwoj-kwoj in Kijone. Jesus ear jelā bwe ejejjet awa eo an bwe en ilok jen lōl in im ilok ññon ibben Jemen. Ear yokwe ro dron ilōl in ien otemjej, im ear yokwe ir ññon jemlokin.

—John 13:1

“Bwe yokwe eo elabtata an juōn armij kin ro jeran eñin: en lelok an mour kin ir.”

—John 15:13

Im jen Jesus Christ, Ri Kennan emol, Manjien, eo ear jerkakbije, eo ej bareinwōt iroi ion *king* ro an lōl. Ej yokwe kij, im ear kōtlok kij jen jerawiwi ko ad kin bōtōktōkin.

—Revelation 1:5

Bwe joñan an Anij yokwe lōl, ear letok Nejin eo ej make wōt,

bwe jabdrewōt eo ej tōmak ilo e en jab jako, ak en mour indrio.

—John 3:16

Ak Anij ear kwalok drettan yokwe eo an elab ññon kij; bwe ilo ien eo ke jaar bed ilo jerawiwi Christ ar mij kin kij!

—Rome 5:8

“Iar walok ññon ir jen ijo ettolok. Kom ri Israel, iar yokwe kom ien otemjej, innem ij kwalok wōt ññon kom aō yokwe eo ejamin oktak.”

—Jeremiah 31:3

Wāwen drein an Anij kar kwalok yokwe eo an ññon kij: ear jilkin-tok Nejin eo ej make wōt ññon lōl, bwe jen maroñ mour kin e.

—I John 4:9

Ejjelok emaroñ karmijjete ke ad tōmak Anij im kabuñ ñōne eau-rōk. Ear walok ilo nememin armij, Jitōb ar kalikkar bwe e eo ewānik, im enjel rōn rar lo e. Ar kwalok kake e ibwiljin ri ailiñ ko, ri lōl in rar tōmak e, im ear wōnliñlok ñōn lōñ. —1 Timothy 3:16

Nan eo ear bed mokta jen jinoin kōmōnmōn lōl; ear bed ibben Anij, im e kab Anij rej juōn wōt. Nan eo ear erom armij im ear mour ibbed. Kimar lo an aibuijuij, im eobrak kin joij im mol. . . . —John 1:1 im 14

Kiō men kein rar walok bwe en kirmol nan ko Iroj ear ba ilo nan ko an ri kanan, einwōt ar ba, “*Vir-*

*gin* eo enaj bōroru im keotak man-jien man im naj naetan Emmanuel” (melelen, “Anij ibbedwōj”). —Matthew 1:22, 23

“Ña im Jema kimro juōn wōt.” —John 10:30

Jesus ear uak, “Philip, etto aō bed ibbemi, ak kwoj jañin jelā kajjiō ke? Jabdrewōt eo emwij an lo iō, emwij an lo Jema. Innem et-ke kwoj ba, ‘Kwon kwalok Jemam ñōn kim?’ Philip, kwojjab tōmak bwe ña ij bed ilo Jema im Jema ej bed ilo ña ke?” Jesus ear ba ñōn ro ri kaloran, “Nan ko iar konono ñōn kom rejjab jen ña. Jema, eo ej bed wōt ilo ña, ej make kōmmōni jermal ko an.” —John 14:9, 10

Jabdrewōt eo ej kwalok bwe Jesus ej Nejin Anij, Anij ej mour ilo e, im ej mour ilo Anij.

—1 John 4:15

Enjel eo ear uak, “Jitōb Kwojarjar enaj itok iom, im kajur an Anij enaj bed ibbam. Kin unin in ajiri in ekkwojarjar naj naetan Nejin Anij.”

—Luke 1:35

Elotak juōn niñniñ ñōn kij! Emwij letok juōn nejid laddrik! Im enaj ad iroj. Naj naetan “Ri Bebe Emeletlet,” “Anij Ekajur,” “Jemed Indrio,” “Iroj in Ainem-mōn.”

—Isaiah 9:6

Ien eo ej konono, juōn kōdro erromak ej beltok ioir tok im juōn

ainikien jen kōdro eo ej ba, “Eñin Nejū Jitenburu ibba, ebuñburuō ibben — komin eoroñ e!”

—Matthew 17:5

Leo ear uak, “Kwon kwalok wōn eo bwe in tōmak e!” Jesus eba ñōne, “Emwij am loe, im e in ej konono ibbam.”

—John 9:36, 37

Bwe aoleben [Christ Jesus] kadkadin im mol eo an Anij ej bed ilo Christ, ilo an kar erom armij.

—Colossae 2:9

Emōkaj air lamōj im ba, “Nevin Anij, ta eo kwo kōnan ibbem? Kwar iten kaiñtan kim mokta jen an jejjet ien ke?”

—Matthew 8:29

Jeus euak, “Komij itok jen lōl, ak ña ij itok jen lōñ. Komij itok jen lōl in, ak ña ijjab itok jen lōl in.” Jesus ear uak, “Ij ba ñōn kom juōn men emol: mokta jen an kar lotak Abraham, ‘Ña ij bed’.”

—John 8:23 im 58

Kōrā eo ear ba ñōne, “Ijelā bwe Messiah eo enaj itok, eo etan Christ. Ñe ej itok enaj kwalok men otemjej ñōn kij.” Jesus euak, “Ña e, ij konono ibbam.”

—John 4:25, 26

Jesus eba ñōn ir, “Ña *bread* in mour. Eo ej itok ñōn ibba ejamin kwule; eo ej tōmak iō ejamin maro.”

—John 6:35

“Ke ij bed ilōl, ij meram in lōl in.”

—John 9:5

Innem Jesus ear bar ba, “Ij ba ñōn kom juōn men emol: Na ij kem ñōn *sheep* ko.”

—John 10:7

Jesus eba ñōne, “Ña jerkakbije eo im mour eo. Jabdrewōt eo ej tōmak iō, meñe emij ak enaj mour.”

—John 11:25

“Komij likit eta Ri Kaki im Iroj, im ejimwe ami ba, bwe eindrein.”

—John 13:13

Jesus ear uake, “Ña ij ial eo, im mol eo, im mour eo. Ejjelok en ej ilok ñōn ibben Jema elañe ejjab kin ña.”

—John 14:6

Jesus ej jiroñ armij ro bwe ren jijet ion melaj eo; innem ej bōk *loaf* ko lalim im eek ko ruo, im reil-iñlok im kammolol Anij. Ear ruje *loaf* ko im lilok ñōn ro ri kaloran, im rar ajeji ñōn armij ro. Ir otem-jej rar mōñā im mat. Ri kalor ro rar kalōñ joñoul ruo ieb kin mat ko matier. Oran ro rar mōñā enañin lalim *thousand*, ijellokin kōrā im ajiri. —Matthew 14:19-21

Ruo ri bilo rar jijet itōreren ial eo im ke rej roñ ke Jesus ej kijon irro rar lamōj im ba, “Nejin David, kwon joij im tiriamokake kimro!” Jesus . . . im kajjitōk, “Ta eo komro kōnan bwe in kōmmōne ñōn komro?” Rar ba, “Iroj,

kimro koñan bwe kwon kebellok mejemro!” Jesus ear tiriamokake irro im uñur mejeirro; ien eo wōt rar lolokjen im lore.

—Matthew 20:30 im 32-34

Simon eba, “Ri Kaki, kimar eñ-wōd aoleben boñ im ejjelok kwonam. Ak elañe kwoj ba, eokwe in-aj drorilok.” Rar drorlōlok ok ko im ear bo bwijin eek im ok ko renañin rub. —Luke 5:5, 6

Jesus ear ilok ñōn mweo imōn Peter, im lo bwe jinen kōrā eo ibben Peter edrolol kin nañinmij in *fever*. Ear uñur bein lio; im nañinmij in *fever* ear jako jene, im liin ear jerkak im jino an kōmmōn kijen Jesus. —Matthew 8:14, 15

## 6 JESUS CHRIST EJ DRI KOMANMAN IM IROIJ

Bwe kin e Anij ear kōmōnmōn men otemjej ilo lōñ im ilo lōl, men ko jej loi im men ko jejjab loi, bareinwōt kajur ko, iroi j ro, ri tel ro, im ri utiej ro ilo men ko an jitōb. Anij ar kōmōnmōn men otemjej ilōñ im ilōl kin Christ, im ñōn Christ. —Colossae 1:16

Kin e Anij ear kōmōnmōn men otemjej, im ejjelok juōn men eo ej bed im Anij ear jab kōmmōne kin e. —John 1:3

Im aoleb renaj kennan kake bwe Jesus Christ ej Iroi j, bwe ren kai-buijuij Anij Jemed. —Philippi 2:11

Anij . . . ak ilo ran kein eliktata ear konono ñōn kij ilo kwalok ko

an Nejin. Anij ear kōmōnmōn men otemjej ilo Nejin, im ear kālet e bwe men otemjej ilo jemlokin ren an. —Hebrew 1:1, 2

“Kiō, ri Israel otemjej ren kanuij jelā bwe Jesus in, eo komar drilaik na ilo drebwel, Anij ear kōmmōn bwe en Iroi j im Messiah!” —Jermal 2:36

Bwe Christ ear mij im jerkakbi-je bwe en Iroi j ion ro remour im ro remij. —Rome 14:9

Jemaroñ liki Anij, eo ear kir kom bwe komin karejar ibben Nejin Jesus Christ, adwōj Iroi j. —1 Corinth 1:9



## JESUS CHRIST EJ DRI EKAJOT MEN OTEMJEJ 7

Innem kwe — etke kwoj ekajete jeiūm im jatūm ilo Iroi? Ak kwe — etke kwoj kejekdron jeiūm im jatūm ilo Iroi? Kij otemjejejenaj jutak iman Anij bwe en ekajete kij. —Rome 14:10

Ij akwelab ñōn yuk iman mejen Anij im Christ Jesus, eo enaj ekajete armij otemjeje, ro rej mour wōt im ro remij: kin itok eo an im kin Ailiñ eo an, ij jiroñ yuk. —2 Timothy 4:1

“Ñe Nejin Armij enaj itok ilo an Iroi, im enjel ro otemjeje an ibben-tok, enaj jijet ion tron in iroi eo an, im aoleben armij in lōl in renaj kweloktok iman mejen. Innem

enaj ajeje ir ilo ruo jar, einwōt an juōn *shepherd* kejibil *sheep* ko jen *goat* ko.” —Matthew 25:31, 32

Im Jemen ejjab make ekajete jabdrewōt armij. Emwij an kamaroñ Nejin bwe eo en ekajet. —John 5:22

Innem, ekkar ñōn Nan ko Rem-mōn ij kwaloki, enaj eindrein ilo Ran eo ñe Anij enaj ekajet lemnak otemjelok rettino ilo buruen armij kin Jesus Christ. —Rome 2:16

“Im ear jiroñ kim bwe kimin kwalok *gospel* ñōn armij, im kamol ke emwij an Anij kālete bwe en ri ekajet ñōn ro ri mour im ro ri mij.” —Jermal 10:42

Ña, kejem eo. Jabdrewōt eo ej dreloñ ilo kejem in, enaj lo lomor; enaj dreloñ im drioj im lo kijen.

—John 10:9

Jesus ear uake, “Ña ij ial eo, im mol eo, im mour eo. Ejjelok en ej ilok ññn ibben Jema elañe ejjab kin ña.”

—John 14:6

“Eñin unin aō ba ññn kom bwe kom naj mij ilo jerawiwi ko ami. Im kom naj mij ilo jerawiwi ko ami elañe komij jab tōmak bwe ‘Nae Na Eo’.”

—John 8:24

Mwijin kowebbene, ear erom unin lomor ññn indrio, ññn aoleb ro rej bokake e.

—Hebrew 5:9

Armij otemjej rar jerawiwi im rej bed ettolok jen Anij eo ej Ri

Lomor. Bwe ilo ankilan wōt, Anij ej letok joiij ilo ejjelok wōnen im kowānik ir otemjej iman mejen kin Christ Jesus, eo ej kanemkwoj ir.

—Rome 3:23, 24

Kin men in, emaroñ lomoren ro rej itok ññn Anij ilo e, kiō im indrio; bwe ej mour ññn indrio im ej oor ññn Anij kin ir.

—Hebrew 7:25

“Lomor ej itok jen e wōt; kinke ejjelok bar juōn ilo belakin lōl in eo Anij ear letok etan ññn armij bwe jen maroñ bōk lomor kin e.”

—Jermal 4:12

Anij ear jab kālet kij bwe jen iñtan ilo an illu, ak bwe jen bōk lomor kin ad Iroj Jesus Christ.

—1 Thessalonica 5:9

Ak Anij ear kōmmōn bwe komin juōn wōt ibben Christ Jesus, im bwe Christ en unin ad meletlet, kab ej unin an Anij kowānik kij iman mejen; innem jej erom armij ro dron Anij, ro emwij kanemkwoj ir.  
—1 Corinth 1:30

Ear lelok e make kin kij bwe en lomoren kij jen aoleb nana ko, im karreoik kij bwe jen an im kōnan wōt kōmmōn emmōn. —Titus 2:14

Im kin lōñliñ komin kammolol Jemed, eo ear kōmmōn bwe komin maroñ bōk ami kōj ilo men ko emwij an Anij keboji ñōn ro dron ilo ailiñ in meram. Bwe ear lomoren kij jen kajur an marok im ear kejbaroktok kij im likit kij ilo ailiñ eo

an Nejin ejitenburu, eo ear kanemkwoj kij, melelen, ear jolok jerawiwi ko ad. —Colossae 1:12-14

“Bwe Nejin Armij ear itok bwe en bukōt im lomoren ro rejako.”  
—Luke 19:10

... “Tellokūm bwe kwon bōk *book* limlim ne Im rube sil ko an. Bwe emwij kar mōn yuk, im kin bōtōktōkūm Kwar wiaik armij otemjej ñōn Anij, Jen bwij, im kajin, im joi, im ailiñ otemjej.”  
—Revelation 5:9

Yokwe en iroj ilo ami mour, einwōt an Christ kar yokwe kij im lelok mour eo an kin kij, einwōt juōn kein katok eñaj eo ej kamōnōnōik Anij. —Ephesus 5:2

## 10 KARREO KIN BOTOKTOK IN CHRIST

Kin bōtōktōkin Christ, Anij ear kowānik kij iman mejen. Innem elablok an alikkar an Christ naj lomoren kij jen idrenwōne eo an Anij. —Rome 5:9

Bwe kom jelā men eo ear kanemkwoj kom jen mour wan, eo komar imminene kake jen ro jimmani. Ejjab juōn men eo emaroñ jako aurōk eo an, einwōt *silver* ak *gold*; ak men eo ear kanemkwoj kom ej menin jortak elab wōnen, bōtōktōk eo eaurōk an Christ, eo ej *lamb* erreo im ejjelok etton ibben. —1 Peter 1:18, 19

Ak elañe jej mour ilo meram — einwōt ke e ej bed ilo meram — jej ibben dron, im bōtōktōkin Jesus,

Nejin, ej karreoik kij jen jerawiwi otemjej. —1 John 1:7

Bwe kin bōtōktōkin Christ, Anij ear kanemkwoj kij, melelen, ear jolok bwid ko ad. Elab wōt joiij in an Anij. —Ephesus 1:7

Elañe men kein remol, ewi joñan an lablok kajur eo ilo bōtōktōkin Christ! Kin Jitōb eo ej indrio, ear aje e make einwōt juōn menin katok eo ewebben ñōn Anij. Bōtōktōkin enaj karreoik bōklikōt ko ad jen jermal ko rewan, bwe jen maroñ jermal ñōn Anij emour. —Hebrew 9:14

... ak jej mōnōnō ilo Anij kin ad Iroj Jesus Christ, eo ear kejer-aik kij ibben Anij. —Rome 5:11

Bwe kin joiy an Anij komar bōk lomor kin ami tōmak. Innem lomor in ej menin letok jen Anij, im jab jen jermal ko ami. Ejjelok unin ami kemjāje, kinke ejjab kin tokjen kate ko ami. —Ephesus 2:8, 9

Kiō ke emwij an Anij kowānik kij kin tōmak, eor ad ainemmōn ibben Anij kin ad Iroj Jesus Christ. —Rome 5:1

Bwe ilo ad juōn wōt ibben Christ Jesus, ejjelok tokjen mwijmwij im jab mwijmwij; men eo wōt eor tokjen: tōmak eo ej jermal kin yokwe. —Galatia 5:6

Innem rar kajjitōk ibben, “Ta eo kim maroñ in kōmmōne bwe ki-

min kōmmōni jermal ko an Anij?” Jesus ear uak, “Eñin jermal eo Anij ekōnan bwe komin kōmmōne: komin tōmak eo ear jilkintok.”

—John 6:28, 29

... “Kwon tōmak ilo Iroj Jesus im kwonaj maroñ bōk mour...”

—Jermal 16:31

Bwe jabdrewōt eo ej nejin Anij emaroñ anjo ion lōl. Wāwen drein ad bōk anjo ion lōl: kin ad tōmak.

—1 John 5:4

Emwij jeje men kein bwe komin tōmak bwe Jesus ej Messiah eo, Nejin Anij, im ilo ami tōmak men in, kom maroñ bōk mour ilo etan.

—John 20:31

Jen kammolol Anij, Jemen adwōj Iroi Jesus Christ, Jemen eo etiriamō, Anij eo ej unin jibañ otemjej!  
—2 Corinth 1:3

O IROIJ, ebar ejjelok anij einwōt kwe; kwoj jeorlok jerawiwī ko an armij ro matan mij. Am illu ejjab bed ññ indrio, ak kwoj kwalok am yokwe ien otemjej.

—Micah 7:18

Joi im yokwe eo am elab etōbar lōñ, Im am mol ekabwe mejatoto.  
—Psalm 108:4

Yokwe eo an IROIJ ejjab bwijrak, im an joi im tiriamo ejamin jemlok; rej kāl jibboñ otemjej; an tiljek ellā jen joñan. —Liejlol 3:22, 23

Einwōt an lōñ ettolok jen lōl, Eindrein an kanuij yokwe ro rej kautiej e. Ak yokwe eo an Iroi ññ ro rej kautieje enaj bed wōt ññ indrio, im enaj kwalok an joi ññ ebeben otemjej.

—Psalm 103:11 im 17

Ear lomored. Ejjab kin jermal ko remmōn jaar kōmmōni, ak kin wōt an tiriamo, ear lomored kin karreo eo jen Jitōb Kwojarjar ke ear kōmmōn bwe jen bar lotak im mour ilo mour ekāl. —Titus 3:5

Innem jen beran in kebak tron eo an Anij, ijo joi ej bed ie. Ijo jenaj bōk tiriamo im lo joi, eo enaj jibañ kij ilo ien ad aikwij.

—Hebrew 4:16

## ANIJ EJ JIRON KIJ BWE JEN ILOK NON E 13

IROIJ ej ba, “Kiō, jen etale men in. Jerawiwi ko ami rekamār kom, ak inaj kwal kom bwe komin erreo einwõt *snow*. Meñe eddro ami mār, ak kom naj mouj einwõt kolan *sheep*.” —Isaiah 1:18

Jitōb im Lio belele rej ba, “Itok!” Jabdrewõt eo ej roñ men in en bareinwõt ba, “Itok!” Itok, jabdrewõt eo emaro; jabdrewõt eo eaikwiji dren in mour in en bōke, einwõt juōn menin letok. —Revelation 22:17

IROIJ ej ba, “Kom ro otemjej rej maro, komin itok — Elōñ dren ibba! Kom ro ri jeramōl, komin itok — Im wia kijimi *bread*! Ko-

min itok im bōk limemi *wine* im *milk* kin ejjelok wōnen!

—Isaiah 55:1

Ran eo eliktata ilo kwojkwoj, ej ran eo elabtata. Ilo ran eo, Jesus ear jutak im ba ilo ainikien elab, “Jabdrewõt eo ej maro en itok ñōn ibba im idrak.” —John 7:37

Ke Jesus ar loe, ear illu im ba ñōn ro ri kaloran, “Komin kōtlok bwe ajiri ro ren itok ñōn ibba! Jab bōbraik ir, bwe Ailiñ in Anij ej an ro einwõt ir. —Mark 10:14

“Komin itok ñōn ibba, kom otemjej ro remōk kin air inek men ko reddro, im inaj kakkijeik kom.” —Matthew 11:28

Eñin ealikkar an einjuōn ro nejin Anij jen ro nejin Devil; jabdrewōt eo ejjab kōmmōn jimwe, ak jab yokwe ro jein im jatin, ejjab nejin Anij.

—1 John 3:10

Ro Jitōbōn Anij ej tel ir, rej nejin Anij. Bwe Jitōb, eo Anij ear lewōj ñōn kom, ejjab kamakokoik kom im kamijak kom; ak ej kōmmōn bwe komin nejin Anij; innem kin kajur an Jitōb in jej kir ñōn Anij im ba, “Jema, Jema!”

—Rome 8:14, 15

Bwe en maroñ ejjelok notami ak komin erreō, einwōt ro nejin Anij rewebben, ro rej jokwe ibwiljin armij ro renana im jerawiwi. Komin

romak ibwiljier einwōt iju ko remeram ilōñ.

—Philippi 2:15

Innem Irojij ej ba, “Komin ilok jen ir, im jibil jen ir. Komin jab kōmmōn jabdrewōt men eo ejjab erreō, Innem inaj kejbarok kom. Inaj Jememi, im kom naj ro nejū man im kōrā, Eindrein an Irojij eo Ekajur Bōtata ba.”

—2 Corinth 6:17, 18

Ak eor jet rar bōk e im tōmak e; kin men in ear kamaroñ ir bwe ren maroñ erom nejin Anij. —John 1:12

“Ejjab aoleb ro rej kir iō ‘Irojij, Irojij,’ renaj dreloñ ilo Ailiñ in lōñ, ak ro wōt rej kōmmōni men ko ankilan Jema ilōñ.’ ”

—Matthew 7:21



## TA EO ANIJ EJ BA NON KIJ KIN DREN IN KADOK

15

Kōnan ko an armij rekanuij in alikkar. Rej alikkar ilo jermal ko renana im etton, im jekkar, ilo kabuñ ñōn ekjab, kab ilo anijnij. Armij rej kijdrate dron, rej ire im bane dron, rej illu im lemnak wōt in kōttōbar man. Rej ajej ilo elōñ jar ko im drolul ko. Rej ebbanban, rej kadrek, im rej belek kwonan dron im men ko eirlok wōt kein. Ij kakkōl kom kiō einwōt iar kakkōl kom mokta: bwe ro rej kōmmōn men rot kein rejamin bōk Ailiñ in Anij. —Galatia 5:19-21

En emmōn mwilid einwōt ro rej mour ilo meram in ran. Jab kōm-

mōn eeb ko retton, jab kadrek, jab belele wan im mijkaie, jab ire im kamo. Ak komin bōk kein tarinae an ad Iroj Jesus Christ, im jab lemnak kin mōm ko an kanniek im kōnan ko an. —Rome 13:13, 14

Kom naj jerata! Komij ruj wōt ñe ej jibboñ im jino idrak drennin kadrek im ñe ejjota komij idrak ñōn ñe kom lukkun kadrek.

—Isaiah 5:11

Elañe elab an juōn armij idrak drennin kadrek ej ekkeroro im kōmmōni men ko rebwebwe. Ej menin bwebwe ñe kwoj kadrek.

—Jabōnkennan 20:1

Jeus ear uake, “ ‘Kwon yokwe Iroj am Anij kin aoleben buruōm, im kin aoleben aam, im kin aoleben am lolātāt.’ Kien eo elabtata im aurōktata in.”

—Matthew 22:37, 38

Ke Jesus ej bar jino an itoitak, juōn likao ear ettōrtok im bukwelōlō iman mejen im kajjitōk ibben, “Ri Kaki emmōn, ta eo ij aikwij in kōmmōne bwe in maroñ jolete mour indrio?” Jesus eba ñōne, “Etke kwoj naeta emmōn? Ejjelok juōn en emmōn ak Anij wōt. Kwo jelā kien ko: ‘Kwon jab uror; kwon jab lejen; kwon jab kwot; kwon jab riab; kwon jab jer-

bal in jelā mon; kwon kautiej jemōm im jinōm.’ ” Innem likao eo ear ba, “Ri Kaki, jen ke iar drik iar bokake kien kein otemjej.” Jesus ear kalimjekloke kin yokwe im ba, “Juōn wōt men kwo likjab jene. Kwon ilok im wiakaki men ko otemjej mweiōm im lelok *money* ko ñōn ro ri jeramōl, im kwonaj mweie ilōñ; innem item lor iō.” Ke likao eo ear roñ men in, ear mejen buromōj im jeblak, kinke ear kanuij lōñ mweien.

—Mark 10:17-22

Ial eo kwoj lemnak bwe ejimwe emaroñ tellok yuk ñōn mij.

—Jabōnkennan 16:25

Komin jab mone kom make; ejjelok juōn emaroñ kabwebwe Anij. Juōn armij enaj madmid leen men ko wōt ear kalbwini.

—Galatia 6:7

Ro nejū, ejjelok juōn en kejebwābweik kom! Jabdrewōt eo ej kōmmōn jimwe ewānik, einwōt an Christ wānik. Jabdrewōt eo ej wōnmanlok wōt ilo jerawiwi ej dron Devil, bwe Devil ear jerawiwi jen jinoin. . . . —1 John 3:7, 8

Kom lukkun jelā bwe ro ri nana rejamin bōk Ailiñ in Anij. Komin jab mone kom make. Ro ri kijoñ, ak ri kabuñ ñōn ekjab, ak ri lejen, ak emman ro remijkaieik dron, ak

ri kwot, ak ri ankwonak, ak ri kadrek, ak ri rurue ro jet, ak ri kowadroñ — ejjelok iair enaj jolete Ailiñ in Anij. —1 Corinth 6:9, 10

Jab kōtlok bwe jabdrewōt armij en mone kom kin nan in bwebwe; kinke unin in an naj itok idrenwōne an Anij nae ro rejjab bokake e. —Ephesus 5:6

Komin jab mone kom make ilo ami roñjake wōt nan eo, ak komin kōmmōn einwōt an ba.

—James 1:22

“Kinke ekanuij naj lōñ armij renaj itok ilo eta im ba, ‘Na Mes-siah eo!’ im naj mone elōñ armij.”

—Matthew 24:5

Jerawiwi ar itok ñōn lōl in kin juōn armij, im an jerawiwi ar bōktok mij. Kin men in, mij ear jedred ñōn armij otemjej, kinke ir otemjej rar jerawiwi. Bwe wōnen jerawiwi, mij . . . . —Rome 5:12; 6:23

Innem kōnan kein renana rej keotak jerawiwi, im ñe jerawiwi ej ekkeke im lab ej keotak mij.

—James 1:15

Bwe elañe mōm ko an kanniek rej iroj ion lolātāt ko ami, kom naj mij; ak elañe kōnan ko an Jitōb rej iroj ion lolātāt ko ami, mour im ainemmōn renaj bed ibemi. Kin men in juōn armij ej erom ri kijdrate Anij ñe mōm ko

an kanniek rej iroj ion lolātāt eo an; bwe ejjab bokake kien Anij, im ilo mol eban bokake.

—Rome 8:6, 7

“Eo wōt ej jerawiwi enaj mij. Nejin ejjab aikwij in iñtan kin jerawiwi ko an jemen, ak bareinwōt jemen ejjab aikwij in iñtan kin jerawiwi ko an eo nejin. Armij eo ewānik enaj bōk wōnen an kōmmōn emmōn, im armij eo ejjerawiwi enaj iñtan kin an jerawiwi.”

—Ezekiel 18:20

Juōn armij eo ej jek ilo buruen bwe en kōmmōni men ko rejimwe enaj mour, ak juōn eo ej kōmmōni wōt men ko rebwid enaj mij.

—Jabōnkennan 11:19

Ilo an Anij, ar alikkar an Nejin Anij kin an kar jerkakbije jen mij kin kajur elab. —Rome 1:4

Mwijin an ba men in ear lamōj kin ainikien elab im ba, “Lazarus, kwon driojtok!” Leo ear mij ear driojtok, emwij kitimi bein im neen kin nuknuk in mij im juōn nuknuk ej binej turin mejen. Jesus eba ñōn ir, “Komin jelat nuknuk ko jene im kōtloke.”

—John 11:43, 44

“Jema ej yokwe iō kinke imōnōnō in lelok aō mour, bwe in maroñ bar bōke. Ejjelok en ej bōk mour eo aō jen iō. Na ij make likiti kin aō kōnan. Eor aō marōn

in likiti im eor aō maroñ in bar bōke. Eñin men eo Jema ear jiroñ iō bwe in kōmmōne.” —John 10:17, 18

Innem ear ilem uñur *box* eo im ro rej bōke rebwijrak. Jesus eba, “Likao en! Ij ba ñōn yuk, kwon jerkak!” Ri mij eo ebar mour im jerkak im jino konono . . . .

—Luke 7:14, 15

“Ñae, ij mour. Iar mij, ak kiō ij mour indrio im indrio. Eor aō maroñ ion mij im ion jikin eo an ri mij.”

—Revelation 1:18

Innem eñin ri kijdrat eo enaj kejebebloke eliktata: ej mij.

—1 Corinth 15:26

“[An IROIJ konono,] ‘Kwon kabuñ ñõn iõ im jab ñõn jabdrewõt anij.

‘Kwon jab ei annañin jabdrewõt men ilõñ ak ion löl ak ilo dren iumin löl. Kwon jab badrikdrik im kabuñ ñõn jabdrewõt ekjab . . . .

‘Kwon jab kejerbal eta bwe kwon kõmmõni men ko renana, bwe ña, IROIJ am Anij, inaj kaje jabdrewõt eo ej kokkure eta.

‘Kwon kejbarok ran in Sabbath im kokkwojarjare, einwõt ña, IROIJ am Anij, iar jiroñ yuk. Kwon kõmmõni jermal ko am ilo ran ko jiljino . . . .

‘Kwon kautiej jemam im jinõm, einwõt ña, IROIJ am Anij . . . .

‘Kwon jab uror.

‘Kwon jab lejen.

‘Kwon jab kwot.

‘Kwon jab riab nae jabdrewõt armij.

‘Kwon jab ankwonake lio belen bar juõn emman; kwon jab ankwonake mweo imõn im bũdrej eo an im ri kamakoko ro an im *cow* ko an, im *donkey* ko an, ak jabdrewõt men eo mweien.’ ”

—Deuteronomy 5:7-21

Jesus ear uake, “ ‘Kwon yokwe Iroj am Anij kin aoleben buruõm, im kin aoleben aam, im kin aoleben am lolâtât.’ Kien eo elabtata im aurõktata in.”

—Matthew 22:37-38

Ej mejek buñten neen armij otemjej. Ejjelok marok jilõñlõñ Emaroñ noj juõn ri jerawiwi jen Anij. —Job 34:21, 22

Ejjelok en emaroñ in tilekek bwe in jab loe. Kom jaje ke bwe ij bed ijoko otemjej ilõñ im ion löl? —Jeremiah 23:24

Inaj ilok ñõn ia bwe in ko jen am Jitõb? Inaj ilok ñõn ia bwe in jab bed iman mejam? Elañe ij wõnliñlok ñõn lõñ, kwe ijo; Elañe ij babu ilo löl an ri mij, kwoj bareinwõt bed ijo. Bõtãb ejjelok marok iman mejam, Im boñ ej romak einwõt ran. Marok im meram rej einwõt juõn ibbam. —Psalm 139:7, 8 im 12

IROIJ ej lo men otemjej ijoko otemjej; ej kalimjek jabdrewõt men ko jej kõmmõni — men ko remmõn im men ko renana bareinwõt. —Jabõnkennan 15:3

Ejjelok men en emaroñ in nojak jen Anij. Menin kõmõnmõn otemjej rej walok im alikkar iman mejen; im jenaj kwalok wāwen aoleben ad mour ñõne. —Hebrew 4:13

“Jabdrewõt men eo emwij noje naj kwaloke na ijo ealikkar, im jabdrewõt men eo emwij kalibubuki naj loe im kwaloke na ijo emeram.” —Luke 8:17

## KAJE EO EJELOK JEMLOKIN NON RO REJAB JELE KIN ANIJ

Mij ej jemlokin ial an ri nana otemjej, Aoleb ro rej ellok jen Anij. —Psalm 9:17

Ak ejja kin nan eo wōt an Anij ej kejbarok lōñ im lōl ko rej bed wōt ññ kiō, mae ien eo naj kokkuri kin kijeek. Anij ej kejbarok wōt men kein mae ran eo enaj ekajete im kokkure ro ri nana.

—2 Peter 3:7

Naj kejibil ir jen iman mejen Iroj im jen aibuijuij in kajur eo an elab, innem kaje eo air ej drien jebeblok indrio.

—2 Thessalonica 1:9

“Elañe beiūm ak neem ej kejebwābweik yuk, jeke im joloke!

Emmōnllok ññ yuk ñe kwoj dreloñ ilo mour ilo an jako juōn bā ak ne jen ñe eiio beiūm im neem ak rejolok yuk na iloan kijeek eo ej urur ññ indrio.” —Matthew 18:8

“Innem armij rein renaj ilok ññ jikin iñtan indrio, im ro rewānik renaj etal ññ jikin mour indrio.” —Matthew 25:46

“Nejin Armij enaj jilkinlok enjel ro an im renaj aini jen Ailiñ eo an ro otemjej rar kōmmōn bwe armij ren jerawiwī, kab ri kōmmōn nana otemjej, im jolok ir iloan kijeek, ijo renaj jañ im matōrtōrie.” —Matthew 13:41, 42



“Bwe emwij an kejenolok juõn ran eo enaj ekajete lõl in kin jejjet im jimwe, kin juõn armij emwij an kãlete. Ear lelok juõn menin kamol ñõn armij otemjej ilo an kar kejerkakbije armij eo!” —Jermal 17:31

Innem Anij ejelã kilen kõtlok armij ro remmõn jen menin melejjoñ ko ñõn ir, im kilen an drebij ri nana iumin iñtan mae Ran in Ekajet eo. —2 Peter 2:9

Bwe kij otemjej, jej aikwij walok iman mejen Christ, bwe en ekajete kij, bwe kajjojo iad enaj bõk tokjen kõmmõn ko an, elañe remmõn ak renana, ke ear mour ilo enbwin in. —2 Corinth 5:10

Eñin unin bwe yokwe en webbenlok ilo kij: bwe jen maroñ in beran ilo Ran in Ekajet eo, kinke ad mour ilo lõl in ejja einwõt eo an Christ. —1 John 4:17

Armij otemjej rej aikwij mij juõn alen, im elikin, Anij enaj ekajete ir. —Hebrew 9:27

Im iar lo ro ri mij, ro reutiej im ro rettã, ke rej jimor jutak iman tron eo. *Book* ko rebellok, innem bar juõn *book* ear bar bellok, *book* in ri mour. Ar ekajete ri mij ekkar ñõn kõmmõn ko air . . . .

—Revelation 20:12

Innem, kajjojo iad naj aikwij in kwalok ñõn Anij wãwen an kar mour. —Rome 14:12

Ak rejro einjuõn, kinke menin letok eo an Anij einjuõn jen jera-wiwi an Adam. Emol bwe elõn armij rar mij kin wõt jerawiwi eo an armij in. Ak joiij an Anij ekanuij lab, im bareinwõt menin letok eo an ñõn elõn armij kin wõt joiij eo an juõn armij, eo ej Jesus Christ.

—Rome 5:15

Kin men in ejjab wawa ion kōnan ko an armij im ion men ko rej kōmmōni, ak ion wõt an Anij tiri-amo.

—Rome 9:16

... “Anij ej jumae ro eutieij bu-rueir, ak ej joiij ñõn ro ettã bu-rueir.”

—1 Peter 5:5

Bwe kom jelã joiij an ad Iroiij Jesus Christ; meñe ear mweie, ear

make kejeramõle kin kom, bwe komin maroñ in mweie kin an je-ramõl.

—2 Corinth 8:9

Jen kammolol Anij kin menin letok eo an elab jen maroñ in ba!

—2 Corinth 9:15

... Ak ijo elõnlok jerawiwi ie, elablok an walok joiij an Anij. In-nem einwõt jerawiwi ear iroiij kin mij, eindrein bareinwõt joiij eo an Anij ej iroiij kin wānik, im ej tel kij ñõn mour indrio kin Jesus Christ ad Iroiij.

—Rome 5:20, 21

Ekanuij kajur an ri jilõk ro kwa-lok im kamol kin jerkakbije eo an Iroiij Jesus, im Anij ear kejeram-mõn ir otemjej.

—Jeral 4:33

“Anij ear jab watōk ien ko armij rar jaje, ak kiō ej jiroñ armij otemjej ijoko otemjej bwe ren oktak jen mour ko air rebwid.” —Jerbal 17:30

“Jab! Ij ba ñōn kom bwe elañe komij jab ukwelok jen jerawiwi ko ami, kom naj mij einwōt ir.”  
—Luke 13:3

Ear ba, “Komin oktaklok jen jerawiwi ko ami, bwe Ailiñ in lōñ ebak!”  
—Matthew 3:2

Peter eba ñōn ir, “Komin ukwelok jen jerawiwi ko ami, kajjojo iami, im baptais ilo etan Jesus Christ, bwe en jeorlok jerawiwi ko ami; im kom naj bōk menin letok an Anij, eo Jitōb Kwojarjar. In-

nem komin ukwelok im oktak ñōn Anij, bwe en jeorlok jerawiwi ko ami.  
—Jerbal 2:38; 3:19

“Komin ellok jen aoleb nana ko komij kōmmōni . . . .”  
—Ezekiel 18:31

Elañe kwoj noj jerawiwi ko am kwo jamin jerammōn. Elañe kwoj kwaloki im oktak jeni, innem Anij enaj tiriamokake yuk.

—Jabōnkennan 28:13

Bwe buromōj eo Anij ej kejerbale ej kōmmōn bwe komin ukōt buruōmi, im ej tel kom ñōn lomor — im ejjelok en enaj buromōj kake men in! Ak buromōj an lōl in ej tel kom ñōn mij.

—2 Corinth 7:10

“Elañe juōn ri jerawiwi enaj bwijrak jen an kōmmōn jerawiwi, im ej jino kejbarok kien ko aō im kōmmōni men ko remmōn im jimwe, innem enaj mour ak ejamin mij.” —Ezekiel 18:21

Ro ri nana ren oktak jen wāwen mour ko air im bareinwōt jen lem-nak ko air. Ren oktak ñōn IROIJ ad Anij; Eobrak kin tiriamo, im emōkaj an jeorlok bwid.

—Isaiah 55:7

“Bwe elañe komij jolok bwid ko an ro jet nae kom, Jememi ilōñ enaj jolok ami bwid.” —Matthew 6:14

Ke Jesus ear lo drettan air tōm-ak ear ba ñōn ri akā eo, “Nejū, em-wij jeorlok jerawiwi ko am.”

—Mark 2:5

. . . komin kanuij jelā bwe ennan eo kin jeorlok jerawiwi ej itok ñōn kom kin Jesus . . . . Anij ear bareinwōt kautieje ñōn tuanbwijmaro-ñin ke ej Ri Tel im Ri Lomor, bwe en kebellok ñōn ri Israel ial in ukwelok im jeorlok bwid.

—Jermal 13:38; 5:31

“Roñjake! Ij jutak imejen kejem im kallallal; elañe jabdrewōt armij ej roñjake ainikiō im kebellok kejem eo, inaj dreloñ iloan mweo imōn im mōñā ibben im enaj mōñā ibba.” —Revelation 3:20

“Im ilo etan ej aikwij in kwalok nan eo kin ukwelok im kin jeorlok jerawiwi ñōn ri ailiñ otemjej, jino jen Jerusalem.” —Luke 24:47

Bwe Anij ear kwalok joiij eo an bwe armij otemjej ren bōk lomor. Bwe joiij in ej katakin kij bwe jen julok mour in jaje Anij kab kōnan ko renana an lōl in, ak jen mour ilo jatōr im jimwe im wānik ilo lōl in.

—Titus 2:11, 12

Komin lemnak kin men ko ilōñ, im jab kin men ko ion lōl.

—Colossae 3:2

Komin jab ellok ibben armij ro kōmmōn ko air rewan im rej an marok. Ak komin bōkitok ñōn meram.

—Ephesus 5:11

Komin jab yokwe lōl in im jab-drewōt men ko an lōl in. Elañe komij yokwe lōl in, ejjelok ami yo-

kwe Jemed. Men ko otemjej an lōl in — mōm an kanniek, men ko armij rej loi im kōnan, kab men otemjej an lōl in ko rej menin kautiej buruen armij, ejjelok ian men kein rej itok jen Jemed, ak aolebeir rej itok jen lōl in.

—1 John 2:15, 16

Kom ri kwot! Ta, komij jab jelā bwe eo ej jeraik lōl in ej kijdrate Anij? Eo ekōnan jeraik lōl in ej ri jumae Anij.

—James 4:4

“Komin karreoik kom. Komin bwijrak jen aoleb nana kein ij lo ami kōmmōni. Komin bwijrak jen kōmmōni men ko renana.”

—Isaiah 1:16

“Inaj lewōj ñōn kom buru ekāl kab lemnak ko rekāl. Inaj jolok ami kiblia bwe komin bokake iō kin aoleben buruōmi.”

—Ezekiel 36:26

Kom jelā bwe Christ ewānik, in-nem komin jelā bwe jabdrewōt eo ej kōmmōn jimwe ej nejin Anij. Jejelā bwe eo nejin Anij ejjab jer-awiwī manlok wōt, bwe Nejin Anij ej kejbaroke, im Ri Nana eo eban kokkure.

—1 John 2:29; 5:18

Ñe jabdrewōt armij ej koba ibben Christ, ej juōn armij kāl, armij eo mokta ejako, im armij eo ekāl ej bōk jikin.

—2 Corinth 5:17

Jesus ear uak, “Ij ba ñōn yuk juōn men emol: ejjelok en emaroñ

in lo Ailiñ in Anij elañe ejjab bar lotak.”

—John 3:3

... Emwij aje kom ñōn Anij; emwij an Anij watōk kom ri wānik ilo etan Iroj Jesus Christ kab kin Jitōbōn adwōj Anij.

—1 Corinth 6:11

Bwe kin nan in Anij eo emour im ej bed ñōn indrio, emwij ami bar lotak einwōt ajiri ro nejin juōn jemen eo eban mij, im jab jen juōn eo emaroñ mij.

—1 Peter 1:23

Im eñin kennan eo: bwe Anij ear letok ñōn kij mour indrio, im mour eo ej ad ilo Nejin. Eo Nejin ebed ibben, mour eo ebed ibben; eo Nejin Anij ejjab bed ibben, mour ejjab bed ibben.

—1 John 5:11, 12

Ilo ien ko mokta komar ri mij ilo mour in jitōb, kinke komar kiblia im jerawiwi. Ilo ad juōn wōt ibben Christ Jesus ear kejerkak kij ibben bwe jen iroiĵ ibben ilo ailiñ eo an ilōñ. —Ephesus 2:1 im 6

Christ ear make bōk jerawiwi ko ad im ineki ñōn drebwel eo, bwe jen maroñ mij jen jerawiwi im mour ñōn kwojarjar. Im kineĵ ko kinjen rar kemour kom.

—1 Peter 2:24

Emwij kejerkak kom ñōn mour ibben Christ. Innem kiō komin kōttōbar men ko ilōñ, ijo Christ ej jĵet ion tron eo an ituanbwijmaroñin Anij. Komin lemnak kin

men ko ilōñ, im jab kin men ko ion lōl. Bwe komar mij, innem mour ko ami renojak ibben Christ ilo Anij. —Colossae 3:1-3

Im ro dron Christ Jesus emwij air mōne kōnan ko an armij ilo ir, kab aoleben mantin mōm ko an. Jitōb ear letok ñōn kij mour; innem en iroiĵ ilo mour ko ad.

—Galatia 5:24, 25

... Emwij ad mij ñōn jerawiwi — innem ekijkan ad maroñ mour ilo jerawiwi? Ilo ejja wāwen in wōt, komin watōk kom ri mij jen jerawiwi, ak ri mour ñōn Anij ilo ami juōn wōt ibben Christ Jesus. —Rome 6:2 im 11

... Elañe ej jeor ine in Jitōb, in-nem enaj madmid mour indrio.

—Galatia 6:8

Einwōt an kar Moses leliñlok *serpent brass* eo ion juōn jor ilo ene jemadren, ilo ejja wāwen eo wōt raikwij in bar leliñlok Nejin Armij, bwe ro otemjej rej tōmak e ren mour indrio. —John 3:14, 15

“Im eñin mour indrio: bwe armij ren jelā kwe, juōn wōt Anij emol, im bwe ren jelā Jesus Christ, eo kwar jilkintok.” —John 17:3

Jabdrewōt eo ej tōmak Nejin eor an mour indrio; jabdrewōt eo ejjab bokake Nejin ejamin mour, ak illu an Anij naj bed ibben indrio. —John 3:36

... Ak menin letok eo an Anij, ej mour indrio, ilo ad juōn wōt ibben Christ Jesus ad Iroj.

—Rome 6:23

“Ij ba ñōn kom juōn men emol: jabdrewōt eo ej roñjake nan ko aō im ej tōmak eo ear jilkintok iō, eor an mour indrio. Ejamin ekajet, bwe emwij an ellā jen mij ñōn mour.” —John 5:24

Jesus ear jiroñ ir, “Komin jab inebata im buk buruōmi. Komin liki wōt Anij, im bareinwōt liki iō. Elōñ *room* ilo imōn Jema, im ij ilen keboj jikimi. Ijamin kar jiroñ kom men in elañe ear jab eindrein.” —John 14:1, 2



Jitōbōn Anij ej koba ibben jitōb ko ad ilo air kwalok ke kij jej nejin Anij. —Rome 8:16

Im eñin kennan eo: bwe Anij ear letok ñōn kij mour indrio, im mour eo ej ad ilo Nejin. Eo Nejin ebed ibben, mour eo ebed ibben; eo Nejin Anij ejjab bed ibben, mour ejjab bed ibben. Ij jeje men kein ñōn kom bwe komin jelā bwe eor mour indrio ibbemi . . . .

—1 John 5:11-13

“Eo ej bōk kien ko aō im bokaki, e eo ej yokwe iō. Jema enaj yokwe eo ej yokwe iō; bareinwōt ña inaj yokwe e im kwalok iō make ñōne.” —John 14:21

Kinke kajjojo armij renaj kōm-

mōni men ko rejimwe, innem renaj ainemmōn im jokane ñōn indrio. —Isaiah 32:17

Bwe en alikkar ke komij nejin, Anij ear jilkintok Jitōbōn Nejin bwe en bed ilo burued, Jitōb eo ej ba, “Jema, Jema.” —Galatia 4:6

Wāwen drein ad lukkun jelā bwe jej mour ilo Anij im ej mour ilo kij: kinke ear letok ñōn kij Jitōb eo an. —1 John 4:13

Elañe jej bokake kien ko an Anij, emol ad jelā e. —1 John 2:3

. . . Ak ij obrak wōt kin kejatdrikdrik, kinke ijelā wōn eo ij tōmake, im ijelā bwe emaroñ kejbakrok men eo ear liki iō kake mae Ran eo. —2 Timothy 1:12

“Im kiō ij iwōj ñōn ibbam, im ij ba men kein ilo lōl, bwe aō lōñliñ en kobrak burueir.” —John 17:13

“... inaj bar lo kom, im buruōmi naj obrak kin mōnōnō, mōnōnō eo ejjelok en emaroñ bōke jen kom.” —John 16:22

Bwe Ailiñ in Anij ejjab kin mōñā im idrak, ak kin wānik im ainemmōn im mōnōnō, ko Jitōb Kwojarjar ej litok. —Rome 14:17

“Einwōt an dren kaju buruen ro rej maro, Eindrein ro dron Anij rej lōñliñ kin an lomoren ir.”

—Isaiah 12:3

Innem ejjab ña eo ij mour, ak Christ eo ej mour ilo ña. Mour in ij

mour kake kiō, ij mour kin tōmak ilo Nejin Anij, eo ear yokwe iō im ear lelok mour eo an kin iō.

—Galatia 2:20

Kwonaj kwalok ñōn iō ial in mour; Am bed ibba ej kobrak iō kin lōñliñ Im am jibañ ej kainemmōn iō ñōn indrio.

—Psalm 16:11

Meñe komar jab loe, ak komij yokwe bwe en maroñ to an bed. Innem kom naj bōk nebar im aibuijuij im utiej ilo Ran eo Jesus Christ enaj weaktok. E, im meñe komij jab loe kiō, ak komij tōmak e. Innem komij lōñliñ kin juōn lōñliñ elab im aibuijuij, elab jen ad maroñ in ba. —1 Peter 1:8

“Ak elañe komij jab roñjake IROIJ im jab bokaki kien ko an, in-nem enaj jumae kom kab *king* eo ami.”  
—1 Samuel 12:15

Kom kanuij jelā men in: ñe komij lelok kom make bwe komin ri kamakoko im bokake jabdrewōt armij, innem komij ri kamakoko an iroijs eo komij bokake — ñe ñōn jerawiwi, eo ej tel kom ñōn mij, ak ñōn bokake, eo ej tel kom bwe Anij en watōk kom ri wānik iman mejen.  
—Rome 6:16

Im enaj kōtlok kom jen ami iñtan, im bareinwōt kim. Enaj kōmmōne men in ilo ien en Iroijs Jesus ej weaktok jen lōñ ibben enjel ro an rekajur, kin urur in ki-

jeek, bwe en kajeik ro rejaje Anij kab ro rejjab bokake Nan eo Emmōn kin ad Iroijs Jesus. Naj ke-jibil ir jen iman mejen Iroijs im jen aibuijuij in kajur eo an elab, in-nem kaje eo air ej drien jebeblok indrio.  
—2 Thessalonica 1:7-9

“Rainin ij lewōj bwe komin kālet elañe komij kōnan jerammōn ak lia — jerammōn elañe kom naj bokaki kien ko an IROIJ ami Anij ij liwōj ñōn kom rainin; ak lia elañe kom jamin bokaki kien kein . . . .” —Deuteronomy 11:26-28

Bwe Anij ejjab kowānik armij kin air roñ wōt Kien eo, ak kin air bokake Kien eo.  
—Rome 2:13

## KWALOK JERAWIWI KO AD NON CHRIST ELABTOKJEN

Wāwen drein ami naj maroñ  
jelā ñe ej Jitōbōn Anij: jabdrewōt  
eo ej ba bwe Jesus Christ ear erom  
armij, eor ibben Jitōb eo ej itok  
jen Anij. —1 John 4:2

Elañe kwoj kwalok kin loñiūm,  
“Jesus ej Iroj,” im tōmak ilo bu-  
ruōm bwe Anij ear kejerkakbije e  
jen mij, kwonaj bōk lomor. Bwe  
jej tōmak ilo burued im Anij ej  
kowānik kij; jej kwalok kin loñid  
im jej bōk lomor. —Rome 10:9, 10

Bwe eo ej karmijjete Nejin ej  
bareinwōt karmijjete Jemen, im  
eo ej bōk Nejin, ej bareinwōt bōk  
Jemen. —1 John 2:23

“Elañe juōn armij ej jook kake  
iō im kin menin katak ko aō, in-  
nem Nejin Armij enaj bar jook  
kake e ñe ej itok ilo aibuijuij eo an  
kab aibuijuij eo an Jemen im enjel  
ro an rekkwojarjar.” —Luke 9:26

Im aoleb renaj kennan kake bwe  
Jesus Christ ej Iroj, Bwe ren kai-  
buijuij Anij Jemed. —Philippi 2:11

“Jabdrewōt eo ej kalikkar iman  
armij ke ej mōtta, inaj kōmmōn  
einwōt ñōn e iman jema ilōñ. Ak  
jabdrewōt eo ej karmijjete iō iman  
armij, inaj bareinwōt karmijjete  
iman Jema ilōñ.”

—Matthew 10:32, 33

Komin ekkōl im kejbarok kom make, bwe Devil, ri kijdrat eo ami, ej itoitak einwōt juōn *lion* eo erorror, im ej reito reitak im lale wōn eo emaroñ kañe. Komin bin ilo tōmak eo ami im jumae e . . . .

—1 Peter 5:8, 9

Innem Jitōb ear tel Jesus ñōn ene jemadren bwe Devil en melejjoñe. Im Jesus euak, “Kwon etal, Satan! Jeje ko rej ba, ‘Kwon kabuñ ñōn Iroiĵ am Anij im jermal ñōn e wōt!’ ” Innem Devil ear ilok jen Jesus; im enjel ro rar item jibañe.

—Matthew 4:1 im 10, 11

Eliktata, komin ejaki kajur ko ami ilo ami juōn wōt ibben Iroiĵ, kab ilo aoleben kajur eo an. Ko-

min kōnak aoleben kein tarinae ko Anij ej liwōĵ, bwe komin maroñ in jutak im jumae etao ko an Devil.

—Ephesus 6:10, 11

Kein tarinae ko kimij kejerbali ilo *am* tarinae rejjab kein tarinae ko an lōl, ak kein tarinae ko rekaĵur an Anij, ko rej kokkure me in tarinae ko rebbin. Kimij kokkure aitwerōk ko rewan. —2 Corinth 10:4

“Devil ej jememi, im kom kōnan lor kōnan ko an. Ekar juōn ri uror jen jinoin. Ejjañin kar jutak ikijjen mol, bwe ejjelok mol ilo e. Ne ej riab ej kōmmōn wōt ekkar ñōn mwil eo mwilin, bwe e ri riab im jemen riab otemjej.” —John 8:44

Kinke ro ear naetair “ajiri” rej armij in kanniek im bōtōktōk, Jesus make ear erom einwōt ir im bōk nememin armij. Ear kōmmōn eindrein, bwe kin mij eo an en kokkure Devil, eo eor an maroñ ion mij. —Hebrew 2:14

Jabdrewōt eo ej wōnmanlok wōt ilo jerawiwi ej dron Devil, bwe Devil ear jerawiwi jen jinoin. Unin an Nejin Anij kar walok, bwe en kokkure jermal ko an Devil. —1 John 3:8

“ ‘Kwon kebellok mejeir im ukōt ir jen marok ñōn meram, im jen kajur an Satan ñōn Anij, bwe kin air tōmak ilo ña, naj jeorlok jerawiwi ko air im bōk jikier ib-

ben armij ro Anij ear Kālet ir.’ ”  
—Jermal 26:18

Innem wōn eo emaroñ kejjibil kij jen yokwe eo an Christ? Ta, jorrān ke, ak mour ebin, ak kaiñtan ko, ak kwule, ak jeramōl, ak kauata-ta, ak mij? Bōtab, ilo men kein otemjej jej lukkun anjo kin e, eo ej yokwe kij! —Rome 8:35 im 37

Kin men in komin kōttāik kom ñōn Anij. Komin jumae Devil, im enaj ko jen kom. Komin ruaklok ñōn Anij im enaj ruakwōj ñōn kom. . . . —James 4:7, 8

“Kiō ejejjet ien ekajete lōl; kiō naj jolok iroi in lōl in jen jikin.”  
—John 12:31

## YOKWE, EJ MELEJON NON JUON MOUR EMON 37

Meñe imaroñ konono kajin ko an armij im bareinwõt an enjel ro, ak ejjelok yokwe ibba, aõ konono ej einwõt ettõntõñin *bell* ak dri-bukbukin aje. —1 Corinth 13:1

Ak men ko leen Jitõb rej: yokwe, lõñliñ, ainemmõn, kijenmij, joiij, mour emmõn, im mol, im ettã buru, im jelã iroiij iom make. . . . —Galatia 5:22, 23

Jesus eba ñõne alen kein karuo, “Simon, nejin John, kwoj yokwe ke iõ?” Ear uak, “Aet, Iroiij, kwo jelã bwe ij yokwe yuk.” Jesus eba ñõne, “Kwon lali *sheep* ko aõ.” —John 21:16

“Elañe komij yokwe iõ, kom naj bokake kien ko aõ.” —John 14:15

Elañe juõn armij ej ba, “Ij yokwe Anij,” ak ej drike jein ak jatin, ej ri riab. Bwe eban yokwe Anij, eo ejjañin loe, elañe ejjab yokwe jein ak jatin, eo emwij an loe. —1 John 4:20

“Elañe komij yokwe dron, innem aoleb renaj jelã bwe komij ri kalora.” —John 13:35

Jejelã bwe emwij ad ellã jen mij im dreloñ mour. Unin ad jelã, kinke jej yokwe ro jeid im jatid. Jabdrewõt eo ejjab yokwe ej bed wõt ilo mij. —1 John 3:14

Bwe eñin melelen yokwe Anij: bokake kien ko an. Im kien ko an rejjab kanuij eddro ñõn kij. —1 John 5:3

Elikin an Jesus jerkakbije, ilo ran eo moktata ilo wik, ear walok mokta ñõn Mary Magdalene, eo Jesus ear kajutaklok jiljilimjuõn timon jen ibben. —Mark 16:9

Anij ear lelok bwe en mij kin jerawiwi ko ad, im ear kejerkakbije e bwe en kowānik kij iman mejen. —Rome 4:25

“Kimij ri kamol kin men otem-jej ear kōmmōni ilo ene ko enen ri Jew ro, bareinwõt ilo jikin kwelok Jerusalem. Rar drilaiki na ion dre-bwel bwe en mij. Ak anij ear kejerkakbije e ilo ran eo kein kajilu, im kōmmōn bwe en bar walok iman mejen armij. Ear jab walok

ñõn aoleb armij, ak ñõn wõt kim, ro emwij an Anij kālet ñõn ri kamol. Kimar mōñā im idrak ibben elikin an kar Anij kejerkake jen mij.” —Jermal 10:39-41

Ke emotlok juõn wik, ro ri kalaran rar bar kwelok iloan mweo, im Thomas ear bed ibbeir. Kejem ko relax, ak Jesus ear itok im jutak iolabeir im ba, “Ainemmōn ñõn kom.” Innem ear ba ñõn Thomas, “Kwon likit addrin beiūm ije, im lale beiō; innem erloke beiūm im karuñloke na ikatū. Kwan jab bar bere, ak kwon tōmak!” Thomas ear uake, “Kwe aō Iroj im aō Anij!” —John 20:26-28



## JERKAKBIJI EJ KEJETRIKRIK EO AD AIBWIJWIJ 39

“... Ien eo ej itok — aet emotok — nē ro ri mij renaj roñ ainikien Nejin Anij, im ro rej roñjake renaj mour. Komin jab bwilōñ kin men in, bwe ien eo ej itok im ri mij otemjej ilo lub renaj roñ ainikien, im renaj walok jen lubeir; ro rar kōmmōn emmōn renaj jerkak im mour, im ro rar kōmmōni men ko renana renaj jerkak im naj liakelok ir.” —John 5:25 im 28, 29

Ta, kom jaje men in ke: ke jaar juōn wōt ibben Christ ilo baptais, jaar bareinwōt juōn wōt ibben ilo mij eo an. Innem, kin ad baptais, jaar mij im kallib ibben Christ, bwe einwōt an kar jerkakbije kin kajur eo eaibuijuij an Jemen, ilo

ejja wāwen in wōt, jen bareinwōt maroñ mour ilo juōn mour ekāl. Bwe elañe jaar juōn wōt ibben ilo mij, einwōt an kar mij; ilo ejja wāwen in wōt jenaj juōn wōt ibben ilo jerkakbije, einwōt ear jerkakbije. —Rome 6:3-5

Ak elañe Christ ej bed ilo kom, meñe enbwinnimi naj mij kin jerawiwi, ak kom naj mour ilo Jitōb kinke emwij an Anij, kowānik kom. Elañe Jitōbōn Anij, eo ear kejerjakbije Jesus jen mij, ej bed ilo kom, innem eo ear kejerjakbije Christ enaj bareinwōt kemour enbwinnimi, enbwinnin mij. Enaj kōmmōn men in kin Jitōb eo an ej bed ilo kom. —Rome 8:10, 11

... Bwe ear iten jibañ ro dron im kanemkwoj ir. ... Bwe enaj lomoren kij jen ri kijdrat ro ad, im kamaroñ ad jербal ñõn e ilo ejjelok mijak; kab bwe jen kwojarjar im wānik iman mejen, toan wõt ad mour. —Luke 1:68 im 74, 75

... Kin men in, jen karreoik kij make jen men otemjej rej katton enbwinnid im aad, im jen kanuij kate kij ñõn kwojarjar ilo ad mour in kautiej Anij. —2 Corinth 7:1

Kiõ, ro jeim im jatim, emwij ami katak ibbem wāwen mour kin mour eo ej kabuñburuen Anij. Im eñin wāwen mour eo komij mour kake. Im kiõ kimij kajjitõk im akwelab ñõn kom ilo etan ad Iroj

Jesus, bwe komin eddreklok wõt ilo mour in. Kom jelā kin katak ko kimar liwōj ñõn kom kin kajur eo ilo Iroj Jesus. Eñin ankilan Anij ñõn kom: ekõnan bwe komin kwojarjar im anemkwoj jen lūñ im mour etton. Kom, emman ro, komin jelā kin wāwen ami belek juõn kōrā ilo kwojarjar im kautiej. Anij ear jab kir kij ñõn lūñ im mour etton, ak ñõn mour kwojarjar. —1 Thessalonica 4:1-4 im 7

Ak komin kwojarjar ilo men otemjej komij kōmmõni, einwõt an Anij, eo ear kir kom, ekkwojarjar. Bwe jeje ko rej ba, “Komin kwojarjar, bwe ña ikkwojarjar.”

—1 Peter 1:15, 16

Mokta jen kōmōnmōn lōl in, eto wōt ke Anij ear kālet kij bwe jen armij ro dron ilo Christ, im bwe jen maroñ in kwojarjar im ejjelok ad bwid iman mejen. Kin an yokwe. Komin kōnak mour eo ekāl, eo kōmōnmōn ilo nememin Anij, im ej make walok ilo mour eo emol, eo ejimwe im erre.

—Ephesus 1:4; 4:24

Enaj wor juōn ial lebleb ijo, Etan, “Ial Eo Ekkwojarjar.” Ejjelok ri jerawiwi enaj etal ilo ial in; Im ejjelok ri bwebwe enaj kejebwābweik ro rej etetal ie.

—Isaiah 35:8

Ak elañe jej kwalok jerawiwi ko ad ñōn Anij, enaj kōmmōn jimwe

im drebij wōt kallimur eo an: enaj jeorlok jerawiwi ko ad im karreoik kij jen bwid ko ad otemjej.

—1 John 1:9

Elañe naj kokkure men otemjej ilo wāwen in, ak enaj kijkan kom, mour rot eo kom naj mour kake? Mour ko ami ren kwojarjar im komin aji ñōn Anij.

—2 Peter 3:11

Komin kajjeoñ in ainemmōn ibben armij otemjej, im kajjeoñ in mour ilo kwojarjar, bwe ñe ejako mour rot in ibben juōn armij, eban lo Iroj.

—Hebrew 12:14

Komin nebar etan eaibuijuij, komin badrikdrik iman Eo Ekkwojarjar ñe ej itok.

—Psalm 29:2

“Meñe kom ri nana, ak kom jelā lelok men ko remmōn ñōn ro neji-mi. Innem enaj kanuij lablok an Jememi ilōñ lelok Jitōb Kwojarjar ñōn ro rej kajjitōk ibben.”

—Luke 11:13

Ke emwij air jar, ijo rej kwelok ie ar makitkit. Ir otemjej rar obrak kin Jitōb kwojarjar, im jino air kwalok nan ko an Anij ilo beran.

—Jermal 4:31

“Inaj likit aō jitōb ilo kom bwe komin lor kien ko aō im kejbarok aoleb nan in kaiñ ko iar liwōji.”

—Ezekiel 36:27

Ak kom, komij jab mour ekkar ñōn mōm ko ami ilo kanniek; komij mour ekkar ñōn Jitōb — elañe

emol bwe Jitōbōn Anij ej bed ilo kom. Jabdrewōt eo Jitōbōn Christ ejjab bed ibben, ejjab mōttan Christ.

—Rome 8:9

“Ak kom naj obrak kin kajur, ñe Jitōb Kwojarjar ej itok iomi, im kom naj ri kwalok kin ña . . . .”

—Jermal 1:8

Barnabas ekar juōn emman emmōn, eobrak kin tōmak im bareinwōt kin Jitōb Kwojarjar. . . .

—Jermal 11:24

Ri kalor ro ilo Antioch rar obrak kin lōñliñ im bareinwōt kin Jitōb Kwojarjar.

—Jermal 13:52

Komin jab kadrek kin *wine*, eo ej kokkure kom; ak komin obrak kin Jitōb Kwojarjar. -Ephesus 5:18

# KALIMUR KO ROMON NON DRI CHRISTIAN RO 43

IROIJ ej ebak ñõn ro rej ebbwer. Ej lomoren ro ejako air kejatdrik-drik. —Psalm 34:18

Ña wõt iar kōmōnmōn lõñ im lõl! Imōnōnō ibben ro ettā burueir im rej ukwelok, ro rej mijak iō im bokake iō. —Isaiah 66:2

Jesus ear uak, “Aet, joñan wõt am maroñ! Eo ej tōmak, emaroñe men otemjej.” —Mark 9:23

Ro jera jitenburu, komin jab ilbōk kin menin melejjoñ ko komij iñtan kaki, einwõt ñe ren kar jab walok ñõn kom. Ak komin mōnōnō bwe eor kwonami ilo iñ-

tan ko an Christ, kab kom naj obrak kin mōnōnō ñe aibuijuij eo an enaj waloktok. —1 Peter 4:12, 13

“Enaj kamōrāik drennin kemjalal otemjej jen mejeir. Mij, limō, jañ im iñtan renaj jako: bwe men ko mokta rejako.” —Revelation 21:4

Komin liki IROIJ im kōmmōn emmōn; komin mour im jokane ieneo. —Psalm 37:3

“Ak komin bukōt mokta Ailiñ eo an im ankilan, im enaj koorlok men kein otemjej ñõn kom.” —Matthew 6:33

## 44 KALIMUR KO NON RO REJ DRELON ILO KABO

Im kiō emaroñ jibañ ro rej bed ilo kabo kinke e make ear bed ilo kabo im ear iñtan. —Hebrew 2:18

Innem Anij, eo ad unin ainem-mōn, enaj mōkaj an juri Satan kin lobidren neemi. . . .

—Rome 16:20

Elañe kwonaj driblok dren ko remwilōl, inaj bed ibbam; iñtan ko am rejamin anjo iom. Elañe kwonaj driblok kijeek ko, kwo jamin bwil . . . . —Isaiah 43:2

Kabo ko otemjej komar iioni, ej-ja kabo ko wōt ro jet rej iioni. Bwe Anij etiljek, im ejamin kōtlok bwe en walok menin kabo ñōn kom elabok jen ami maroñ; ak ilo ien an

walok menin kabo ko, Anij enaj kakajur kom bwe komin maroñ in kijenmij, im joor jen menin kabo ko. —1 Corinth 10:13

Elōñ inebata rej kaiñtan juōn armij eo emmōn, ak IROIJ ej lomo-rene jen men kein otemjej.

—Psalm 34:19

Jejelā bwe Anij ej kōmmōn emmōn ilo men otemjej ibben ro rej yokwe e, ro emwij an kir ir ekkar ñōn ankilan. —Rome 8:28

*Priest* lablab in ad ejjab juōn eo eban tiriamo kin mōjno ko ad, bwe emwij kabo e ilo men otemjej einwōt kij, bōtab ear jab jerawiwi. —Hebrew 4:15

“Jabdrewōt eo ej anjo enaj bōk men in jen iō: inaj an Anij im enaj nejū.”  
—Revelation 21:7

“Eo ej anjo inaj kōmmōne bwe en juren Temple an aō Anij, im ejamin bar emmakit jene. Inaj jeje etan aō Anij ion, kab etan jikin kwelok an aō Anij, Jerusalem ekāl, eo enaj wōnlōltak jen lōñ jen aō Anij. Inaj bareinwōt jeje āt eo eta ekāl ion.”  
—Revelation 3:12

“Ro rej anjo naj eindrein air ekkōnak nuknuk mouj, im ijamin jeorlok etair jen *book* in ri mour. Inaj kwalok iman mejen Jema im enjel ro an bwe rej aō.”  
—Revelation 3:5

“Ñōn ro rej anjo inaj kemelim air jijet ibba ilo tron eo aō, ejja einwōt aō kar anjo im kiō ij jijet ibben Jema ilo tron eo an.”  
—Revelation 3:21

“Innem, ñe eor lojilñūm, kwon roñjake men eo Jitōb Kwojarjar ej ba ñōn eklesia ko!” “Ñōn ro rar anjo, inaj kemelim bwe ren mōñā leen wijki in mour, eo ej eddrek ilo Jikin Kallib an Anij.”  
—Revelation 2:7

Ro rej anjo im rej wōnmanlok wōt ilo air kōmmōn ankilaō ñōn jemlokin, inaj lelok ñōn ir ejja maroñ eo wōt iar bōk jen Jema.  
—Revelation 2:26

Ñõn ro emwij air belele, eor juõn kien ibba, ijoke ejjab aõ, ak an Iroj. Eñin: juõn kõrã eo emwij an belele en jab jibil jen leo belen; ak elañe ej jibil jene en bed make ian, ak bar juõn, en jeblak ñõn leo belen. Im leo belele en jab jolok lio belen. Juõn kõrã eo eor belen ejjab anemkwoj jen leo belen toan wõt an leo mour. Ak elañe emij leo belen, innem emaroñ belek eo ekõnan, ak en belele in Christian.

—1 Corinth 7:10, 11 im 39

Ilo wanjoñok kake, kien ej liãbe juõn kõrã ñõn leo belen ilo ien eo wõt ke leo ej mour; bõtãb, elañe emij leo, emejal lio jen kien eo ekar liãbe ñõn leo. Innem elañe lio

ej bed ibben bar juõn emman ilo ien an leo belen mour, naj watõk lio ri lejen; bõtãb elañe leo belen emij, lio ej anemkwoj jen kien eo im ejjab, lejen elañe ej belek bar juõn.

—Rome 7:2, 3

“Jabdrewõt emman eo ej jolok lio belen im belek bar juõn kõrã ej jerawiwi kin lejen; im leo ej belek lio emwij an mare ej bareinwõt jerawiwi kin lejen.”

—Luke 16:18

“Ak kiõ ij jiroñ kom: ñe juõn emman ej jolok lio belen, ak lio ekar mol wõt ñõne, innem eor ruõn leo kin an tel lio ñõn lejen ñe lio ej bar belele; im eo enaj belek lio ej bareinwõt lejen.”

—Matthew 5:32



# JESUS CHRIST ENAJ JEBELAKTOK NON LALIN 47

“Innem kakōlle eo kin Nejin Armij enaj walok ilo mejatoto; innem aoleben bwij ko ilo lōl renaj jañ, im renaj lo Nejin Armij ej itok ilo kōdro ko ilōñ kin kajur im aibuijuij elab.” —Matthew 24:30

“Innem elañe juōn armij ejook kin ña im katak ko aō ilo ran kein renana im armij rejaje kin Anij, innem Nejin Armij enaj jook kake e ñe enaj itok ilo aibuijuij an Jemen . . . .” —Mark 8:38

Kom ro jitenburu, jej ro nejin Anij kiō, ak ejjañin alikkar wāwed tokelik. Ak jejelā men in: ñe Christ ej waloktok, jenaj erom einwōt e, bwe jenaj lukkun lo e.

Jabdrewōt eo ej kejatdrikdrik einwōt in ilo Christ, ej kejbarok bwe en erreō wōt, einwōt an Christ erreō. —1 John 3:2, 3

“Im mwijin aō ilok im keboj jikimi, inaj jeblaktok im bōk kom ñōn ibba, bwe komin bed ijo ij bed ie.” —John 14:3

“Innem komin bareinwōt bojak, kinke Nejin Armij enaj itok ilo ien eo ejjelok ami kōtmene kake.” —Luke 12:40

“Bwe Nejin Armij enañin waloktok ilo aibuijuij eo an Jemen ibben enjel ro an, im enaj nawōnen jabdrewōt ekkar ñōn jerbal ko an.” —Matthew 16:27

## 48 NAN EO AN ANIJ

“Lõñ im lõl renaj jako; ak nan ko aõ rejamin jako.” —Luke 21:33

Bwe ejjelok nan in kanan ear waloktok jen ankilan armij wõt, ak Jitõb Kwojarjar ear kamakit im kakkonoik armij ro ilo air kwalok kin nan in keañ eo jen Anij. —2 Peter 1:21

Bwe aoleb jeje ko ilo Bible rej letok in Jitõbõn Anij, im elab tokjeir ñõn katakin kin mol eo im ñõn kauwe nana, im kajimwe bwid ko, im lelok nan in katakin kin mour eo ejimwe. —2 Timothy 3:16

Am in nan ej einwõt juõn lam eo ej tel iõ, ej einwõt juõn meram ñõn aõ ial. —Psalm 119:105

## JAR IM JERLOK BWID

“En wāwen drein ami jar: ‘Jememuij ilõñ: en kwojarjar im utiej etam; En itok am Ailiñ; kimin kōmōnmōn ankilam ilõl einwõt air kōmmōn ilõñ. Letok ñõn kim kijim rainin. Jolok amuij bwid ibbam, einwõt kimij julok bwid ko an ro jet ibbem. Am melejjoñe kim en jab ellā jen joñan, ak kwon kejbarok kim jen Eo Enana.’ [Bwe am Ailiñ im kajur im aibuijuij indrio, Amen.] Bwe elañe komij jolok bwid ko an ro jet nae kom, Jememi ilõñ enaj jolok ami bwid. Ak elañe komij jab jolok an ro jet bwid, innem Jememi ilõñ ejamin jolok ami bwid.’” —Matthew 6:9-15

## VAL EO AN ANIJ NON LOMOR

*Ij aikwij dri Lomor.*

Armij otemjej rar jerawiwi im rej bed ettolok jen Anij eo ej Ri Lomor. —Rome 3:23

Jerawiwi ko ami rej kōmmōn bwe en jab roñjake kom. . . . —Isaiah 59:2

*Christ ear mij kin io.*

Bwe Christ make ear mij kin kom; ear mij kin jerawiwi ko juōn wōt alen. E ri wānik ear bōk jikin ro renana, bwe en maroñ tel kom ñōn Anij. . . . —1 Peter 3:18

*Ij aikwij ukelok jen jerawiwi ko ao.*

Elañe kwoj noj jerawiwi ko am kwo jamin jerammōn. Elañe kwoj

kwaloki im oktak jeni, innem Anij enaj tiriamokake yuk.

—Jabōnkennan 28:13

*Ij aikwij bok Jesus kin tomak.*

Ak eor jet rar bōk e im tōmak e; kin men in ear kamaroñ ir bwe ren maroñ erom nejin Anij. —John 1:12

*Imaron lukkun in jele kin lomor eo ao.*

Eo Nejin ebed ibben, mour eo ebed ibben. . . . —1 John 5:12

“Ij ba ñōn kom juōn men emol: jabdrewōt eo ej roñjake nan ko aō im ej tōmak eo ear jilkintok iō, eor an mour indrio. Ejamin ekajet, bwe emwij an ellā jen mij ñōn mour.” —John 5:24

Published in numerous languages by World Missionary Press as God supplies funds in answer to prayer. Other booklets are also available. If you would like more copies for careful distribution, please write in English to:

World Missionary Press, Inc.  
P.O. Box 120  
New Paris, Indiana 46553-0120 USA

Marshall Is.

9/94

MZM

267 Marshallese

0